



# Kriminal težak 36 miliona KM

U akciji Delta pripadnici **SIPA** pretresli su 29 lokacija, a uhapšeno je i nekoliko osoba, dok se za nekima traga

Pripadnici **Državne agencije za istrage i zaštitu (SIPA)** jučer su tokom akcije nazvane Delta pretresli 29 lokacija na području Brčkog, Obudovca, Bijeljine, Tuzle, Srebrenika, Živinica, Sarajeva, Zenice, Travnika, Novog Travnika,

Viteza, Posušja, Gruda, Ljubuškog i Mostara.

## Lociranje osumnjičenog

Istragom su, kako smo saznali, obuhvaćene 34 osobe koje se terete za krivična djela organizirani kriminal u

vezi s krivičnim djelima nedozvoljen promet akciznih proizvoda i pranje novca. Za sada je privedeno nekoliko osoba, a na čelu grupe se, kako nezvanično saznajemo, nalazi osoba sa područja Hercegovine.

- Na lociranju te osobe, koja je odranije poznata, intenzivno se radi. Dvije osobe su nedostupne policiji i za njima se traga, rekao nam je izvor blizak policiji.

Iz **SIPA** je saopćeno da se osumnjičeni terete da su u saradnji sa drugim osobama, s ciljem sticanja protivpravne imovinske koristi, osnovali grupu za organizirani kriminal radi nezakonitog stavljanja u promet duhana za pušenje i cigareta, bez plaćanja akcize na duhan za pušenje i cigarete i bez obilježavanja navedenih proizvoda akciznim markicama BiH, čime je budžet BiH oštećen za oko 36.000.000 KM po osnovu neplaćene akcize na duhan za pušenje i cigarete, saopćeno je iz **SIPA**.

## Mašine i proizvodi

Tokom akcije, koja je provedena po naredbi Suda i Tužilaštva BiH, pronađena je i veća količina duhana i gotovih duhanskih proizvoda, mašine za rezanje, te drugi predmeti koji će biti korišteni kao dokazi.

A. B. Č.



Pretresi su trajali satima